

## Langkah perlu diambil pertahan warisan Melayu

Tulisan jawi begitu sinonim dengan bangsa Melayu dan memainkan peranan penting dalam memartabatkan bahasa Melayu sebagai bahasa ilmu sejak kedatangan Islam di rantau ini pada abad ke-13.

Malah, disedari atau tidak, ia terlalu istimewa kerana di seluruh dunia, tulisan ini hanya terdapat dalam masyarakat Melayu saja berbanding tulisan rumi yang digunakan secara meluas dalam pelbagai medium bahasa.

# Memartabatkan tulisan jawi

Apabila kuasa barat menjajah kita, tulisan jawi semakin terpinggir kesan daripada pengaruh sistem pendidikan barat sehingga ada segelintir masyarakat yang tidak tahu membaca dan menulis jawi.

Semua pihak dalam masyarakat kita dan umat Islam seharusnya prihatin terhadap kedudukan tulisan jawi pada hari ini.

Adalah lebih penting bagi kita untuk memikirkan ba-

gaimana tulisan jawi dapat diberi tempat dan kedudukan yang sewajarnya serta membuktikan kecintaan kita terhadap penggunaannya.

Bukan itu saja, kita juga perlu memartabatkan semula penggunaan tulisan jawi kerana ia bukan saja suatu kemahiran, tetapi juga sebagai ilmu dan dapat kita memperkayakan khazanah ilmu yang sudah sedia ada dalam diri kita.

Sudah tentu sebagai se-

orang Islam, kita ingin mendekatkan diri kepada al-Quran dan sunah.

Malah, kita ingin tergolong dalam golongan umat Islam secara lebih bermakna kerana kita sedar umat Islam sudah membina satu tamadun yang besar dan kita tidak mempunyai pilihan melainkan hidup sebagai seorang Islam yang berwawasan.

Jika tidak, kita mungkin akan kehilangan prinsip dan keperibadian, kehilangan identiti dan maruah dan akan pergi jauh daripada al-Quran dan sunah.

Jika diteliti, masyarakat ki-

ta hari ini tidak banyak mempraktikkan tulisan jawi.

Bahan yang dicetak dalam tulisan jawi juga terlalu kurang dan kebanyakannya dicetak ke dalam tulisan rumi.

Inilah antara kesannya kenapa masyarakat hari ini tidak pandai membaca jawi. Sepatutnya orang Melayu lebih suka menggunakan tulisan jawi dalam pembacaan dan penulisan mereka, namun perkara yang berlaku hari ini tidak sebegitu rupa.

Secara umumnya masyarakat kita lebih suka membaca dan menulis dalam tulisan rumi. Masyarakat se-

ring melaungkan mahu mempertahankan warisan Melayu. Ironinya mereka tidak menyedari tulisan jawi itu adalah sebahagian daripada warisan Islam.

Demi menambah minat dan usaha untuk meningkatkan perasaan cinta terhadap tulisan jawi, kita mesti merancang pelbagai program untuk rakyat agar dapat mengembalikan kegemilangannya.

**Siti Nur Fatimah Faqih**

**Kamaruzaman**

Universiti Sains Islam Malaysia

Negeri Sembilan

### FAKTA

Tulisan jawi hanya terdapat dalam masyarakat Melayu saja